

# Air cukup hadapi kemarau

**K**UALA LUMPUR: Jabatan Pengairan dan Saliran (JPS) yakin musim kemarau panjang yang dijangka melanda negara Mac ini, dapat ditangani dengan baik berikutan beberapa empangan utama khususnya di Johor, sudah dipenuhi air, hasil daripada fenomena hujan luar biasa sejak Disember lalu.

Ketua Pengarahnya, Datuk Keizrul Abdullah, berkata tiga empangan termasuk Empangan Bekok di Segamat dan Sembrong di Batu Pahat kini penuh sehingga melepasi paras bahaya dan simpanan airnya boleh digunakan ketika musim kemarau melanda.

Katanya, sejak Disember lalu semua kawasan di seluruh negara menjadi lebih basah akibat hujan lebat terutama di selatan tanah air.

“Berikutan itu, persediaan kita menghadapi musim kemarau adalah di tahap baik. Ini disebabkan bekalan air kita melimpah sehingga terpaksa dibuang sedikit secara perlahan-lahan supaya empangan tidak pecah,” katanya.

Keizrul berkata, masalah perubahan cuaca ekstrem di seluruh dunia ketika ini turut memberi kesan terhadap negara ini dan keadaan cuaca tidak menentu dapat dilihat sejak kira-kira lima tahun lalu.